



## ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

### ՈՐՈՇՈՒՄ

19 մայիսի 2020 թվականի թիվ 39-Ա

ք. Երևան

#### «ՄԱՅ ՆԵՏ» ՄՊ ԸՆԿԵՐՈՒԹՅԱՆ ՆԿԱՏՄԱՍԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՑԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ՝ Հանձնաժողով) ուսումնասիրելով դիմումի հիման վրա 2020 թվականի մարտի 09-ին հարուցված թիվ 3 վարչական վարույթի նյութերը՝ *պարզեց*:

2020 թվականի մարտի 09-ին Հանձնաժողով մուտքագրված «ՅՈՒՔՈՄ» ՓԲ ընկերության (այսուհետ՝ Իրավատեր) դիմումում նշված է հեռուստառադիոծրագրերի կաբելային (մալուխային) հեռարձակում իրականացնող «ՄԱՅ ՆԵՏ» ՄՊ ընկերության (այսուհետ՝ Ընկերություն) կողմից խախտում կատարելու փաստի վերաբերյալ:

Իրավատերը հայտնում է, որ Ընկերությանն է տրամադրել TNT4 International (TNT4 Интернэшнл), THT Comedy (THT Комеди), Friday International (ПЯТНИЦА Интернэшнл) հեռուստաալիքների վերահեռարձակման ոչ բացառիկ իրավունքները մինչև 2019 թվականի դեկտեմբերի 31-ը, սակայն Ընկերությունը սույն թվականի հունվարի 1-ից սկսած շարունակում է իր մալուխային ցանցի միջոցով վերահեռարձակել այդ հեռուստաալիքները՝ առանց համապատասխան փաստաթղթերի և պայմանագրերի:

Իրավատերը հանդիսանում է վերոնշյալ հեռուստաալիքների մալուխային հեռարձակման լիցենզային պայմանագրեր կնքելու իրավասություն ունեցող բացառիկ ներկայացուցիչը Հայաստանի Հանրապետությունում:

Հանձնաժողովը ղեկավարվելով «Վարչարարության հիմունքների և վարչական վարույթի մասին» ՀՀ օրենքի 30-րդ հոդվածի 1-ին մասի ա) կետով և հիմք ընդունելով Իրավատիրոջ 2020 թվականի մարտի 09-ի դիմումը՝ 2020 թվականի մարտի 09-ին Ընկերության նկատմամբ հարուցել է վարչական վարույթ:

Հանձնաժողովը 2020 թվականի մարտի 09-ին հարուցված վարչական վարույթի մասին ծանուցել է Ընկերությանը և հայտնել, որ այս հարցի վերաբերյալ կարող են ներկայացնել իրենց պարզաբանումները, բացատրությունները և իրավական հիմքերը:

Հիմք ընդունելով «Հայաստանի Հանրապետությունում արտակարգ դրություն հատարարելու մասին» Կառավարության 2020 թվականի մարտի 16-ի թիվ 298-Ն որոշումը, հաշվի առնելով, որ Պարետի ցուցումով կարող են սահմանվել Հայաստանի

Հանրապետության համապատասխան համայնքի վարչական սահման մուտք գործելու և վարչական սահմաններից ելք կատարելու հատուկ ռեժիմ և ղեկավարվելով «Արտակարգ դրության իրավական ռեժիմի մասին» ՀՀ օրենքի 1-ին և 8-րդ հոդվածներով և «Վարչարարության հիմունքների և վարչական վարույթի մասին» ՀՀ օրենքի 49-րդ հոդվածով, Հանձնաժողովը 2020 թվականի մարտի 20-ին թիվ 21-Ա որոշմամբ՝ մինչև 2020 թվականի ապրիլի 14-ը կասեցրել է Ընկերության նկատմամբ 2020 թվականի մարտի 09-ին հարուցված թիվ 3 վարչական վարույթը, որի մասին Ընկերությանը տեղեկացվել է:

Հարուցված վարչական վարույթի ընթացքում և վարույթը վերսկսելուց հետո Ընկերության կողմից որևէ պարզաբանումներ և բացատրություններ չեն ներկայացվել Հանձնաժողով:

Հանձնաժողովը ղեկավարվելով «Հեռուստատեսության և ռադիոյի մասին» ՀՀ օրենքի 45.1-րդ հոդվածի դրույթներով և հիմք ընդունելով Հանձնաժողովի նախագահի 2020 թվականի մայիսի 12-ի թիվ 14-Ա հրամանը՝ իրականացրել է մշտադիտարկում հեռուստառադիոձրագրերի կաբելային (մալուխային) հեռարձակում իրականացնող Ընկերությունում, որի արդյունքում արձանագրվել է, որ Ընկերության կողմից չեն վերահեռարձակվում TNT4 International (TNT4 Интернэшнл), THT Comedy (THT Комедия), Friday International (ПЯТНИЦА Интернэшнл) հեռուստաալիքները:

***Հանձնաժողովի հիմնավորումները (պատճառաբանությունը) և եզրահանգումը.***

Հանձնաժողովի կողմից ուսումնասիրվել է վարչական վարույթի մասնակիցների կողմից ներկայացրած փաստերը, որոնք համադրվել են մշտադիտարկման՝ Ընկերությունում տեղում դիտարկում իրականացնելու արդյունքներին և «Հեռուստատեսության և ռադիոյի մասին» ՀՀ օրենքի խախտում չի հայտնաբերվել:

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով Ընկերության նկատմամբ հարուցված թիվ 3 վարչական վարույթը ենթակա է կարճման:

«Հեռուստատեսության և ռադիոյի մասին» ՀՀ օրենքի 9-րդ հոդվածի 2-րդ մասի համաձայն՝ Հայաստանի Հանրապետությունում լիցենզավորված հեռուստառադիոընկերություններն օտարերկրյա հեռուստառադիոընկերությունների ձրագրերը կարող են վերահեռարձակել պայմանագրային հիմունքներով:

«Հեռուստատեսության և ռադիոյի մասին» ՀՀ օրենքի 52-րդ հոդվածի 1-ին մասի համաձայն՝ օրենքով սահմանված կարգով հեռուստառադիոհեռարձակում իրականացնող՝ Հայաստանի Հանրապետության տարածքում և նրա սահմաններից դուրս գործող ընկերությունների հեռուստառադիոձրագրերը հեռուստառադիոձրագրերի կաբելային (մալուխային) հեռարձակման լիցենզիա ստացած անձի կողմից կարող են վերահեռարձակվել միայն Հանձնաժողովի թույլտվության հիման վրա:

Թույլտվությունը տրվում է, կամ դիմումը մերժվում է վերահեռարձակում իրականացնելու համար Հանձնաժողովին դիմելուց հետո՝ 15-օրյա ժամկետում:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

Վարչական իրավախախտումների վերաբերյալ ՀՀ օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և հիմք ընդունելով «Հեռուստատեսության և ռադիոյի մասին» ՀՀ օրենքի 9-րդ հոդվածի 2-րդ մասի, 52-րդ հոդվածի 1-ին մասի, Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները՝ Հեռուստատեսության և ռադիոյի հանձնաժողովը *որոշեց*.

1. Կարճել «ՄԱՅ ՆԵՏ» ՍՊ ընկերության նկատմամբ հարուցված թիվ 3 վարչական վարույթը:

2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ  
ՀԱՆՁՆԱԺՈՂՈՎԻ ՆԱԽԱԳԱՀ**

**Տ. ՀԱԿՈԲՅԱՆ**

19 մայիսի 2020թ.

ք. Երևան